

# Tamanawt tadelsant deg tmurt n Dzayer Tamanawt n tgemmi tarangawit -Tujjya tayerfant d amedya-

Cultural diversity in Algeria

Diversity of immaterial heritage -Folk medicine as a model-

MERRADI Massika (Doctorante)\*

Sous la direction de : Pr. BOUGUERRA Kame\*\*

Co-encadreur : Dr. BAYU Salah\*\*\*

date d'acceptation : 26/04/2021/Date de soumission : 10/04/2021

## Agzul :

Yetteggarad yidles deg tmurt n Dzayer seg tgemmi tangawit d tarangawit, i d-yemmalen tamagit tagraylant i tmetti Tadzayrit. Tamanawt-a tetef tujjya tayerfant yesean idawiyen iyerfanen yemgarden, mani ttusemrasen deg tmetti Tadzayrit s uamata s yiswi n udawi n waɗanen yexs n tfekka ney n tnefsit ney n tmetti s yiman-nnes, seg-sen adawi s yiyemmayen yesean abayur d ameqqran d usemres awesean deg tmetti-a, yella dayen adawi s uzuri n yinilen d tnedlaw n Lewliya Ssalhin, atg. Amagrad-a yeqqen yer tujjya tayerfant deg tmurt n Dzayer s wudem amatu, mani nessbadu-d cra n wawalen yeqqen yer usentel-nney, needda nebder-d cra seg yidawiyen yettusemrasendeg tujjya tayerfant deg tmetti Tadzayrit d mamek i ttusemrasen, mani newweɗ deg uneggaru

yer ugemmuɗ i d-yellan s umgired n tujjya tayerfant d umxalef n yidawiyen-nnes deg tarrayin d wallalen yellan tettusemras yes-sen.

Awalen irezzamen : Tamanawt tadelsant, Idles, Tigemmi tarangawit, Tujjya tayerfant, Dzayer.

## Abstract:

The diversity of culture in Algeria from a material and immaterial heritage that reflects the national identity of Algerian society. This diversity includes folk medicine, which in turn is diverse in popular therapies, which are generally used in Algerian society for treatment of physical, psychological and social diseases, including herbal therapy, which is of great use and intensive use in Algerian society. Our article revolves around the diversity of folk medicine in Algeria in general, where we have defined some of the concepts on the subject, and then identified some of the popular treatments practiced in Algeria and how they are practiced.

Keywords: Cultural diversity, Culture, Immaterial heritage, Folk medicine, Algeria.

\* Université Batna -1-, Algerie, مخبر الموسوعة  
الجزائرية الميسرة, [massika.merradi@univ-batna.dz](mailto:massika.merradi@univ-batna.dz) (Auteur correspondant)

\*\* Université Batna -1-, Algerie,  
[Kamel.bougerra@univ-batna.dz](mailto:Kamel.bougerra@univ-batna.dz)

\*\*\* Université Batna -1-, Alger,  
[bayu.salah@univ-batna.dz](mailto:bayu.salah@univ-batna.dz)

### Tazwert

Yal timetti tesæa idles-nnes wehd-s i tt-yessemgaraden yef tmewtiwin teyyid, d agemmuḍ n tmeddurt-nnes yezrin d tiritin-nnes d tiktiwin-nnes i tesæa, i d-yugiren seg tsuta yer tict, tettwarfad seg yict yer yict al mi tewweḍ yer tallit n yimir-a. Idles yettef yal tyawsa tangawit d tarangawit deg

tmeddurt d yinagrawen-nnes, akked yal tyawsa yessemras-itt umdan deg tmetti.

Tigemmi tarangawit d amur yesæan azal deg umezruy n yegduden d yidles-nsen, yettef matta yeqqen ukk yer tmeddurt n umdan deg tmetti, isnilla d tesbirin, tutlayt, tiktiwin, abrid n tmeddurt-nnes i d-yettbeyyanen idles-nnes d tmagit-nnes. Yezmer dayen ad yili d abrid yeqqen jar tsuta, d tagejdit n usnirni d umhaz, d amur agejdan deg uskay n tmagit n cra n ugdud seg yegduden ney cra n tmetti, tigemmi-a am nettat am yidles, tettbeddal, tettemhiz tettnirni seg tsuta ayella n tsuta.

Tamurt n Dzayer am nettat am tmura teyyid deg umḍal, tesæa idles-nnes, yemgared yef tmewtiwin teyyid, ula d timnaḍin-nnes mgardent deg jar-asent, deg-s tamanawt tadelsant yeqqen yer yisnilla d tesbirin n yimezday-nnes, tiktiwin d teflas-nsen, iseflan d yimenzayen-nsen, atg, tigemmi-nnes tæerrem temgared ama d tangawit ney d tarangawit, temgared seg tmenadḥ yer tict, seg tgemmi tarangawit n Dzayer ad naf tujjya tayerfant.

Tujjya tyerfant deg tmurt n Dzayer temgared, seg tallit taqburt al mi tura, ad ttnaf tettusemras s wudem yemgared seg temnadḥ yer tict, seg læerc yer yict, teqqen yer tektiwin n yudan d tesreḥt-nsen, akked yidles n lejduḍ d yimezwura-nsen, ḥerzen fell-as labas n yiseggasen al imir-a, deg-s tamanawt deg wannaw n yidawiyen, yezmer ad yili d adawi n waḍanen ney d adawi n tnefsit n umdan ney d rruḥ-nnes, tujjya-a tewseḥ labas, yezmer umaḍun ad yaf deg-s adawi i t-iwalmen, tetteawan-it bac ad d-yuæa tadawsa-nnes, ad yaweḍ yer yiswi-nnes deg tmeddurt, ad yaf tumert d lehna n tnefsit d rruḥ-nnes.

Seg wawal-a nezmer ad d-nuc aseḡsi agejdan iyef ibedd unadi-nney : Deg matta i d-tettban tmanawt n tujjya tayerfant deg tmurt n Dzayer ? Matta llan yidawiyen iyerfanen yettusemrasen deg-s ?

### Tarrayt

Yal anadi ilaq-as tarrayt i t-iwatan bac ad yemmug deg tegnit yeḥlan. Deg unadi-nney nedfer tarrayt tagelmant mani i d-nekti cra n yidawiyen iyerfanen yettusemrasen deg tujjya tayerfant deg tmurt n Dzayer s umata, neglem-d mamek yettmuggan yer yimezday d matta yettusemrasen deg-sen s wudem amatu.

### 1-Tibadutin

#### 1-1-Idles

Tabadut n yidles temmekres labas, axaḥer weræad ud mfahimen ca yisnamettiyeḥ d yisnalsanen yef tict n tbadut ibanen, ad naf Williams Raimond izerr idles d cra n tarrayt deg tmeddurt, yexs yer ugdud, ney d agraw, atg (بينيت وآخرون، 2010، صفحة 232) yeeni teqqen s labas yer tyerma. Ilmend n tmuyli n yimnadiyeḥ idles yeqqen s wudem amatu yer tyerma, axaḥer idles n yal timetti ney agdud d llsas n tyerma-nnes, deg tiktiwin-nnes d tikli-nnes, d ayan n tmeddurt-nnes (العمرى، 1998، صفحة 16).

Tettwasbadu-d belli d idles n tmetti yeḥḥur s matta i ilaq ad yessen umdan ney ad yamen yes-s, yeggur s tarrayt tettwaqbal yer yudan ukk..., idles maci deg-s yudan ney tiyawsiwin ney tikliwin berk maca d asuddes n tyawsiwin-a deg umdan s yiman-nnes, d tiyawsiwin yellan ttxemmamen deg-sen yudan (Spradley , 1973, pp. 6-7). Idles yettef tagruma n yiferdisen yettzerriren yef tdawsa d waḍan s wudem ibanen, tetteḥtef tikliwin n umdan, seg yisnilla d tesbirin, asizdeg, arebbi, axemmem n umdan d tmuyli-nnes yef yal agmam deg tfekka-nnes, yal yict s wazal-nnes (مساني، 2018، صفحة 161).

Idles d tagruma n tmussniwin, imenzayen, isnilla d tesbirin, yellan yettedder yes-sen ugraw imetti ney d timetti s yiman-nnes, bla

ma nettu aswir n usnerni n tussna-nnes, d tagruma n tyawsiwin yeqqnen yer tmetti ney yebdan jar yudan yellan deg-s, seg uzawan, tazuri tayerfant, tisbirin, yettwarfad seg yict yer yict (454 صفحة، أمزيان).

Ilmend n yisnalsanen, idles d tarrayt ney d ayan n tmeddurt i tettedder yal timetti seg yisnilla d tesbirin, izerfan, amezruy, tiflas, tasredt, imenzayen, azalen d yibriden ihulfanen, d matta yedran deg yizri d yimir-a (16 صفحة، عومري، 2017).

Ihi, seg tbadutin i ieddadan nezmer ad d-nini belli idles d tagruma n yisnilla d tesbirin d tmussniwin d tirmatin yesea umdan deg tmeddurt-nnes, ttwarfaden syer lejdud ney d imezwura seg tsuta yer tict, yemxalef seg tmetti ney agdud yer yiğ, yemzer ad ibeddel ney yemhez ney ad yennerni.

### 1-2-Tamanawt tadelsant

Yettawi yidles talyiwin mgardent ilmend n wakud d wadeg, mani i d-yettban tamanawt-a deg lasel d tmagit yemgarden i ugrawen, d tmettiwin tilsanin, yerni tettwaglam tamanawt tadelsant d aybalu n umbadel, allus, asnulfu, yellan yelzem labas i yemdanen. Yerni tettwasbadu-d belli d amgired deg tarmitin, d yixemmimen yeqqnen yer-sent, bac ad yili uferreq jar yemdanen (عبد العزيز المطوع، وجابر المري، 2019، صفحة 23).

Tessbadu-t-id UNESCO, tenna-d belli : « *Tmanawt tadelsant yessewsae ibriden n tmeddurt i yal amdan bac ad yefren matta yexs, axater d netta d aybalu n unerni maci d anerni adamsan berk maca d allal i usiwed yer tmeddurt tahulfant taruhanit yehlan, seg wa yettawi tamanawt yer uskay n tmeddurt ikemlen* » (603 صفحة، بلعز، 2019).

Awal-a iwella yettwassen deg tallit n yimir-a s labas, axater d awal yewsee yemmekres, yesea labas n tbedutin yal tict iman-nnes, yemhez al mi yewwed yeqqnen yer umgared jar yudan, ilmend n tmettiwin-nsen, idelsanen-nsen, llan yyid beyynen-d mlih deg uswir-a belli tamanawt tadelsant teqqen yer

umgired deg yidles, asyan, tutlayt, tiflas tiserdanin, tamagit d tuzzuft (عبد العزيز المطوع، وجابر المري، 2019، الصفحات 18-19).

Tamanawt tadelsant d aferdis agejdan deg umhaz n umdan d tmetti s wannawen-nnes d talyiwin-nnes yemgarden, maci deg umhaz n yidles berk maca yettawan deg umhaz n tikiwin d usnulfu alsan deg tayulin yemgarden. Tamanawt tadelsant maci d agel ilaq ad nehz fell-as berk maca d tyawsa ilaq ad tt-ncennee wa ad tt-nesseneet i yudan d tmettiwin ukk, ad as-nuc azal d ameqqran s wudem ibanen imi yesea labas n yibayuren d tixutert i as-irennin deg umhaz d unerni ujar yer sdat 23 -21 (عمارة، 2015، صفحة 12، 15).

Ihi, seg tbadutin i ieddadan nezmer ad d-nini tamanawt tadelsant d magired yellan jar yidles d tmetti d tmetti tict, deg wayen yeean isnilla d tesbirin, tutlayt, anagraw imetti, amdan s yiman-nnes, yesea tulmisin mxalfent seg ugraw alsan yer yiğ.

### 1-3-Tigemmi

Temxalef tbadut n tgemmi yer yimazrayen d yisnamettiyen d yifelsafiyen, yal yiğ mamek i d-yeqqar, yyid qqaren d tagruma n tmuyliwin n wannawen, d yisnilla iyerfanen yegguren seg tsuta yer tict (شيلز، 2004، صفحة 38، d tyawsa yettwarfaden seg tsuta yer ta i d-yusin ayella-nnes, ney seg yizri yer yimir-a, tigemmi-a tettwaxdem syer yimdanen, yugir-d s ubrid n tikiwin d usugen (قحايرية ومناصرة، 2016، صفحة 9).

Tigemmi d aferdis yeddren deg umezruy, d matta yettwawraten deg ugraw, tettals-d amezruy n tagruma talsant, teggur seg tsuta yer tict (التراث الصحراوي، التاريخ والذاكرة، أعمال ندوة الداخلة الدولية، 2012، صفحة 17). Tigemmi s umata d yal tyawsa taqburt, i d-ggin lejdud ney d imezwura i tsuta i d-yusin ayella-nsen, d tagruma n matta yettwağgen deg umezruy, tebna-d temddurt n tmettiwin yemxalfen, tetteqqen jar yizri d yimir-a (حميدة، 2019، صفحة 100).

Ihi, seg tbadutin i iæddan nezmer ad d-nini tigemmi d tagruma n tirmatin n umdan deg tmeddurt-nnes, i d-yerfed seg ugama d twennaqt i as-d-yezlin, akked yudan d yigrawen imettiyen, taqqen yer yizri s labas, mamek teqqen yer tidet i yettedder umdan akked yimal-nnes.

### 1-4-Tigemmi tarangawit

Tessbadu-d UNESCO deg 2003 deg Paris tigemmi tarangawit belli d tagruma n : « *Iseflan, ixemmimen, talyiwin n tenfalit, timussniwin, d tzemmarin d matta yeqqnen yer-s seg wallalen, matta yettwaxedmen d yidgan idelsanen, yella ttsawan-ten yigrawen ney yudan d amur seg tgemmi-nsen tadelsant. Tigemmi-a tarangawit teggur seg tsuta yer tict, yal agraw ireffed-it syer yict ilmend n twennaqt ideg yettili, d temsekrawt-nsen id n ugama d umezruy-nsen, tyawsa-a teğğa-ten ad ħulfun s tmagit-nsen d ukemmel yer sdat, bac ad yili usnerni deg tamanawt tadelsant d usnulfu alsan* » (صفحة 82، 2018، العبيدي).

Tigemmi tarangawit, d tagruma n yimenzayen, ibriden d teflas yellan yettamen yes-sen umdan, teṭṭef-d tutlayt d tantaliwin-nnes, tiflas d tmussniwin tiyerfanin (zzredt, tujjya tayerfant...), akked yisnilla d tesbirin, izerfan d yisudaf. Teṭṭef-d dayen tasekla tayerfant (taḥkayt, timseereqt, tumgist, tamedyezt...), dayen teṭṭef-d tazuri tayerfant (rrqes d ccna) (عمر الصادق، 2006، الصفحات 311-312).

Tattwasbadu-d dayen belli teṭṭef : « *Isnilla ney talyiwin n tenfalit yeddren yettwarefden seg yimezwura-nney, tugir seg tsuta yer tict al mi tewwed-d yer-ney ass-a, am yisnilla n timawit, tazuri, iseflan imettiyen d yisekkiren, tifaskiwin d tmussniwin, iseflan yeqqnen yer ugama...* » (حميدة، 2019، صفحة 101).

Ihi, seg tbadutin i iæddan nezmer ad d-nini belli tigemmi tarangawit tbedd yef yisnilla d tesbirin i yettedder umdan deg tmeddurt n yal ass, d umxalef n tnfaliyin tidelsanin n yigrawen, yal agraw s tenfalit-nnes akked yal amdan, d tmussniwin-nsen yemxalfen, i

ittuččen tulmisiin i yal agdud deg tmetti yemxalfen yef tmetti nniđen.

### 1-5-Tujjya tayerfant

Ssbadun-d tujjya tayerfant belli d tiktiwin ukk d tmuyliwin tiqburin yef waḍan n udawi d matta i d-eyqqnen ukk seg yiseflan i uḥraz seg waḍan d udawi-nnes (الخولي، 1982، صفحة 161). Yettwasbadu-d dayen belli d tagruma n yidawiyen i d-yusin seg tirmitin d tmussniwin n yigduden, izemren ad ṭṭfen azal-nsen d wadeg-nsen ilmend n tilin n tujjya tatrart.

Yezmer dayen ad tusbadu tujjya tayerfant belli d tagruma n yiseflan d waḍan angawi d teflas i yessnen yudan seg tarmitin d tgemmi tayerfant belli tessertahay ney tetteawan deg ccfa n yimuḍan s usemres n matta yellan deg ugama seg yiyemmayen d mattayeqqnen yer yidisan iruḥanen d idelsanen n tmetti (صالح محمود، 2007، صفحة 127).

Tuddsa n tdawsa tamaḍlant tetthenna tujjya tayerfant d talya seg talyiwin n tujjya taqburt, tessbadu-tt-id belli : « *D tarrayin d wallalen i d-yellan sdat n tilin n tujjya tussnant tatrart. Dayen deg-s idawiyen idawsanen yeqqnen yer tgemmi n yal timetti, teggur seg tsuta yer tict* » (سفاري وشين، 2013، صفحة 199).

Ihi, seg tbadutin-a nezmer ad d-nesbadu tujjya tayerfant d abrid n udawi i deffren yudan deg tmetti deg udawi n waḍan d uḥraz yef tdawsa, s usemres n matta yellan deg ugama d tmeddurt, yettwarfed-d seg tsuta yer tict, seg tallit taqburt al mi yewwed yer tallit n yimir-a.

### 2-Tamanawt n tujjya tayerfant deg tmurt n Dzayer

Tujjya tayerfant deg tmurt n Dzayer teerrem terni temgared seg tallit taqburt al mi tura, ad naf yal tamnaqt mamek i tettusemras deg-s, s tarrayin yemgarden bac ad awḍen yer yiswi-nsen deg udawi d ccfa seg waḍanen yemgarden.

Tujjya tayerfant ad tt-naf tebḍa yef sent n tewsatin : tujjya tayerfant tagamant, am udawi s

tyudi, tajbirt, iyemmayen...atg, tujjya tayerfant taħergant, am udawi s leħruz d leħjub d uzuri n Lewliya Ssalhin, atg, d labas n tarrayin n udawi teyyid yeqqent yer tmetti s umata awlya timetti tadzayrti mani ttammen yudan belli adawi-a aħerfan yesea abayur yessawaħ yer yigemmad yehlan deg udawi n labas n waħanen yemxalfen (سرقمة، 2011، صفحة 198).

Ɛerrmen yidawiyen yettusemrasen deg tujjya tayerfant tadzayrit, maca tyawsa tamezwarut llan ttammen ukk s lmektub d matta i asen-d-yuca Rebbi syer-s, qeblen-t rħan yes-s, id n tyawsa-a llan ttammen s udawi d tilin n tmental i uħraz yef tdawsa s umata, ħefren abrid i d-yenna Nnabi Muħemmed 'ad isella fell-as Rebbi wa ad isellem', akked yixerriken llan ssuren id n tujjya-a, yal yiğ s matta yettamen deg udawi yezmer ad isew seg waman n cra n wanu, ney ad ielleq leħruz d leħjub deg yiri-nnes, ney ad iħur Imrabeħ d Lwaley Ssaleħ, awalya tisednan ttammen s labas s yixerriken deg udawi bac ad dawant wa ad tħfent adeg-nsent deg tmetti awalya ta yella d tajjert tħffer abrid-a bac ad tarew wa ad teqqim id n urgaz-nnes ud yettruħa ca fell-as ad iħewwes yef tmetħut tict (أبو القاسم، 1998، صفحة 417).

Seg yidawiyen yemgarden deg tujjya tayerfant tadzayrit, ad d-nebder cra seg-sen :

### 2-1-Adawi s iyemmayen

Adawi-a yebdu deg tmurt n Dzayer seg tallit taqburt al mi d ass-a, seg mi d-rgin wħanen yemxalfen, tħfen yudan helken-ten al mi mmuten, d wa-ya i ten-yeğğin ad wellan yer udawi aqbur ney tujjya tayerfant bac ad dawan iman-nsen (صحراوي، 2010-2011، صفحة 39)، dawan s iyemmayen mamek nezra belli iyemmayen seg tallit taqburt llan seān azal d ameqqran deg wuħči d udawi.

Ad naf labas n iyemmayen ttdawan labas n waħanen maci d yiğ berk, mani i d-beynent-id tezrawin titrarin belli tamurt n Dzayer teħħur s iyemmayen azal n 3500 n tewsatın, jar-asen azal n 500 n iyemmayen ttwassnen yer yudan ukk deg udawi, d wazal

n 100 n iyemmayen werēad ttusenān al imir-a deg leswaq yer yiēccaben (بوħجرة، 2015، صفحة 68).

Llan labas n yudan i yessnen adawi-a seg-sen Lihud yellan deg tmurt n Dzayer llan ssuzan ddawat akked Yimzabiyen, llan dayen Leqbayel yeseān iyemmayen s labas yemxalfen, iyemmayen-a llan ssemrasen-ten d takenmadt ney d lebxur ney d ifez am uselyay tteffzen-t wa ad d-yellef i waman wa ad t-sseylin (حمودي ومصباحي، 2017-2018، صفحة 49).

Ad naf dayen imezday n temnaħin n usammer Adzayri ttwassnen mliħ s usemresn udawi s iyemmayen, llan seān taznuzit yehlan deg taħult-a, seg ddawat n iyemmayen yettwassnen yer-sen: zimba, zzeħter, icammen, keħran, tabselt, zzit n uzemmur akked watig ixeddmn seg yizem n tsetħa n tayda (بوħجرة، 2015، صفحة 68).

Tawennaħt n tmurt n Dzayer teħħur s iyemmayen ujjayen am yizri, lħenħel, tazeggart, takerwit d nneēnaēi yehlan i lewjee n ueeddis, leqcur n warmun i yiri, tħib i lewjee n teymas, atg. Ad qqimen iyemmayen d llsas n udawi agejdan mani yexs yewweħ uswir n udawi atrar, axaħer tixutert-nsen teqqim deg tmetti tuta s uħwer mliħ (ماقري، صفحة 12).

Teerrem tujjya tayerfant deg tmurt n Dzayer, temxalef, llan ssemrasen labas n tarrayin tiqburin i udawi n cra n waħanen, llan tteellaqen icelliqen deg tsetħwa d iyemmayen bac ad dawan aħan am waħan n tħaēun yettwassnen zik deg tmurt-a awalya deg tallit n Letrak, llan ttuħħen i umaħun cra n ddwa seg iyemmayen yesseddad mliħ, ad yedded bac ad d-yellef ssmumat yellan deg tfekka-nnes, wa ad t-yetħan s uglim n uyersiw (حمودي ومصباحي، 2017-2018، صفحة 50).

Llan dayen ttsawan amħaun deg teddart iman-nnes wa ad as-ucen tazart deg zzit n uzemmur ney d lexlie (aksum yeqquren) way-a i udawi n waħan n tzerzayt (شوتيام، 2006-)

(صفحة 295، 2005، llan ssemrasen lebxur s labas awalya tisednan bac ad mmukksen fell-asen waḍanen (حمودي ومصباحي، 2017-2018) (صفحة 51، ttbexxaren tani s ulili bac ad temmukkes tusit yeqwan fell-asen d waḍan n turawin (بوحرارة، 2015، صفحة 69).

Iyemmayen ttusemrasen d ddwa s tarrayt temxalef, yezmer ad yettwasew ney ad yettwaddez d amenyud ney yemmug d takemmadt, d izem ney ttekksen-d seg-sen zzyutat, atg, yettusemras ukk ney d iferdisen seg-sen am tferca, iyeddiwen, izuran, tinewwarin, agummu, zzerriet...atg (مساني، 2018. Llan ttdawan timess s uyemmay n cendagura, ma d lejruḥ d yikebbuben ttdawan-ten s tferca n cra n yiyemmayen, ma yehreq yiḡ ud yenndurr ca labas ttdawan-t s lhenni, ma yettwaqqes yiḡ s tyirdemt ney d talefsa ttdawan-t s tebselt d ticcirt deg wadeg n waqqas, maca adawi agejdan yer-sen d tamemt dima yella yehḍer deg udawi, d llsas n tujjya yer yudan ukk (أبو القاسم، 1998، صفحة 418).

Seg wawal-a nezmer ad d-nini adawi s yiyemmayen yella-d seg wass mi d-yella umdan yef tmurt-a, yettusemras deg tmettiwin yemxalfen awalya timetti tazayrit, deg yal tamnaḍt seg temnaḍin-nnes, ttwellan yudan ney imuḍan s lexsus yer ugama bac ad afen adawin-nen, ad kksen aqraḥ i ten-iḍurren, ad d-uean tazmert-nnen wa ad ssertahen tanefsit-nnen.

### 2-2-Adawi s ureqqi

Yessemras-it umdan seg tallit taqburt deg udawi mani bla ma yecrek s Rebbi subḥanu, yessemras-it meḥsub yiḡ d ameqqran iebbed Rebbi, ney yezmer ad yerqa umdan iman-nnes ney d yiḡ seg twacult-nnes s Lquran d wawalen n Nnabi Muḥammed 'ad isella Rebbi fell-as wa ad isellem', reqqan aman wa ad ten-ucen i umaḍun ad isew ney ad yessired yes-sen, yella mani ssemrasen yid-s cra n lebxur i udrae n ccwaṭen (شين، 2014-2015، الصفحات 171-173).

Ierrem ureqqi imir-a deg tmurt n Dzayer s labas, ttammen belli deg-s ccfa d rreḥmet i lmunin ukk, tthenan-t d allal i udawi n waḍanen, tettusemras yer yudan ukk maci izawaliyen d yimeyban berk, qqaren belli win ireqqan d Ṭṭaleb ney d Ccix yesea lbarakt deg ufus-nnes yettawi-d ccfa (حمودي ومصباحي، 2017-2018، صفحة 52).

Adawi-a ierrem axaṭer yeqqen yer tesreḍt d Lislam, yerni iwessa fell-as Nnabi Muḥammed 'ad isella fell-as Rebbi wa ad isellem', llan yyiḍ ssemrasen-t s tarrayt yehlan ulac deg-s n tyawsa yettwaḥerrmen, yyiḍ ssemrasen-ten s tilin n lejnun yellan d abrid yettuḥerrem ud yehli ca.

Yezmer ad ssaren cra n yisekkiren iserdanen ney iyerfanen tgara n ureqqi, d amedya yezmer ureqqay ad iderrer tisent yef tfekka n umaḍun, matta i d-yeqqimen deg ufus-nnes ad t-isawa seddu n tsebbalt n waman wa ad yini: «A taewint ili d tasemmaḍt» kraḍ n tikal, axaṭer tisent tettwakti-d deg tujjya n Nnabi maca tarrayt n usemres-nnes d asfel ayerfan, seg wa yessur usfel aserḍan akked uyerfan (شين، 2014-2015، صفحة 172، 246).

Nezmer ad d-nini ilmend n matta i ieeddan, areqqi yella seg zik deg tmurt n Dzayer maca yettmugga s leḥruz d lehjub mani iqerra ccix awalen ud ttwafhamen ca yef umaḍun, maca yemhez iwella s wudem yehlan ud yettwaḥerrem ca ass mi d-yudef Lislam, wellan Ṭṭelba d Ccyuxa reqqan s Lquran d wawal n Rebbi yeggur al mi yewweḍ yer uswir yehlan deg tallit n yimir-a, maca weread qqimen yyiḍ ssemrasen deg ureqqi cra n yisekkiren qqnen yer yixerifen n zik.

### 2-3-Azuri n yinilen n Yimrabḍen d Lewliya Ssalḥin

Azuri n yinilen n Lewliya Ssalḥin d Yimrabḍen d utberrek yis-sen d amur seg yisemras d yiseflan iyerfanen, yeqqen yer tesreḍt deg yidles n tmetti tazayrit, ibedd s yizuran deg tikli timettit n yudan, yeqqim yedder deg teflas tiyerfanin. Amdan s

timmad-nnes ad t-naf ud ihemmel ca d yeğğ ayen ssemrasen lejdud-nnes, iðeffe-ihen ami yezmer bac ad yili am nehni wa ad yettef abrid-nsen yellan deg tallit taqburt ad t-yesselmed i yya i d-yusin ayella-nnes.

Defren yudan deg tmurt n Dzayer abrid-a deg udawi seg waðanen, llan zerren Imrabden d Lewliya Ssalhin sean lbarakt ma zuren-ten ad d-tehwa fell-asen rreħmet d ccfa wa ad ħawzen fell-asen adanen, thennan-ten sean tazmert d tameqqrant deg udawi n waðanen, ssemrasen cra n tyawsiwin deg lemqamatnsen, tetten seg ucal-nsen, ney ttbexxaren s yiyemmayen yer-sen, ney tetten seg tsetta yellan deg lemqam-idin (بوحررة، 2015، الصفحات 71 - 72).

Ma d wayen yeqqnen yer yisnilla d tesbirin deg wassay n yinilen, tbedd yef sen n yidisan igejdanen, amezwaru d aħraz yef tgemmi tadelsant (tangawit, tarangawit), yettwarfaden seg tsuta yer tict. Wis sen d mamek i temmug tmetti s yiman-nnes, yeyleb fell-as unagraw n teqbilt, tuta s uzwer deg tmetti mamek llan zik deffren cra n ccix ney d amyar ameqqran yettef taqbilt-idin, ud rrayen ca yef wawal-nnes, ttqadaren-t, yexs d Amrabeđ ney d Lwaley Ssaleħ (Devoulx , 1870, p. 122).

Ad naf deg tmurt n Dzayer eerrmen yinilen, ud nettaf ca aqewwar ney tamdint bla yinil, ma d tamnađt yellan ulac deg-s thennan-tt ulac deg-s n lbarakt, d adeg ud yesei ca azal deg tmetti, txuss-it tyawsa ud yelli ca am yidgan nniđen, maca wa-ya yeqqen yer Lwaley Ssaleħ s yiman-nnes, ma yesea azal deg tmetti s labas ney qič, ma yesea lbarakt teħla deg udawi ney drus, ma yettuqadar mliħ ney aha, d wa-ya yeğğin idgan yyid ulac deg-sen n yinil (دويده، 2015، صفحة 16).

Dayen llan yiseflan yyid qqnen yer twuri n ccfa seg waðan ney d arebbi n tnefsit n bnađem ney d asizdeg-nnes (العامري، 2001، صفحة 340) ttmesaħen yimuđan s ufus-nsen yef lemqam n Lwaley Ssaleħ, umnen s lqudert-nnes yef lbarekt d ccfa i yesea (عطا، 2018-2019، صفحة 34)

bac ad telben seg-sen ad ten-ssiwden yer usirem-nsen d matta yexsen deg tmeddurt-nsen, tettruħa ta yellan ur tercil ca, ta ireclen yesean uguren jar-as d urgaz-nnes, ta yellan d tajjert bac ad tarew, tettawi tmettut memmi-s bac ad yeqra wa ad yeeqal, atg, ttadfen deg lemqam bla tyuni, d adeg uyris am netta am tmesgida (فراح، 2012، صفحة 102).

Ad naf labas n temnađin d yidgan yettusemman s yisem n Lwaley Ssaleħ ney d amrabeđ, am 'Sidi Belæebbas, Sidi Filas, Sidi Eebd Reħman Taalibi...' yettwassnen mliħ deg tmurt n Dzayer (دويده، 2015، صفحة 17). Ttwellan dayen yinilen d idgan eennan deg-sen yiyriben d yimsebriden ney d yya irewlen seg ddulet, axater d adeg uyris ħedd ud izemmer ad yennuy deg-s ney ad ssergen yiğ seg-s s tgedri (رشيق، 2010، صفحة 23).

Ttzuren-ten yudan ukk yexs d tameđtut ney d argaz, d lyerz ney d ameqqran, yercel ney d aezri, yeqra ney d ljahel, azawali ney d amerkantı. Ma d iswan yessaramen seg uzuri-idin eerrmen, llan yiswan idawsanen yeqqnen yer ccfa seg waðanen d uħraz yef tdawsa n umdan, llan yiswan ikramanen bab-nnes yettnadi ad yaf lehna d tumert deg tmeddurt-nnes, ad ibaæed fell-as tiđ d leħsed d ccer, ad yawi lbarekt d lxir wa ad as-yuc matta yexs. Llan yiswan imettiyeen, yella win yexsen ad yetleeb seg yinil laman, yella win yexsen ad yetleeb tameawna, yyid tellben lxir i yemsebriden d yiyriben, atg, llan dayen yiswan iserđanen, yal yiğ yexs ad yaweđ yer tumert tnefsit-nnes deg tmeddurt d laxert, ad ikenna yer Rebbi s ubrid n Lewliya Ssalhin (دويده، 2015، الصفحات 20 - 21).

Nezmer ad d-nini seg wawal-a ukk, belli azuri n yinilen d tnedlaw n Lewliya Ssalhin d Yimrabden deg tmurt n Dzayer yella seg tallit n zik yeqqim al imir-a, axater llan yudan zik thennan Lewliya-a sean lbarakt d ccfa, win iruħen yer-sen ad yertah, yexs ddren ney mmuten, qqimen yudan deg tmetti tadzayrti ttammen yes-sen, yal yiğ txuss-it tyawsa ad iruħ ad izur Lemqam ney anil n Lwaley yellan deg temnađt-nnes bac ad t-ieawen deg

tmeddurt-nnes, ad yaweḍ yer yiswi-nnes ney ad as-yuc ccfa d tumert d lbarakt deg uxxam-nnes d twacult-nnes.

### 2-4-Tiḥemmamin tigamanin

Ad naf timetti tadzayrit tettwella yer ṭhemmamin tigamanin s labas, ttruḥan bac ad dawan aḍanen awlya aḍan yuʿeren (دودو، 1975).  
(صفحة 14. Ttusemrasen waman n ṭhemmamin-a deg udawi n labas n waḍanen am Buzewway, axaṭer ččuren s tisent d lkebrit d yizayuren yyiḍ, llan dayen ttceēalen yimuḍan ticemēay deg ṭhemmamin-a, ḍeffren walen n Ṭṭelba d Ccyuxa i asen-d-yennan amm-idin (حمودي ومصباحي، 2018 - 2017، صفحة 54).

Aman imelḥanen seān tixutert d tameqqrant deg tayult n tdawsa d udawi deg tmetti tadzayrit, ttdawan lejruḥ d yizemzal, atg, ssrusan agmam yuḍnen deg waman imelḥanen azal n 03 n wussan al mi d 07 n wussan, yetteawan deg usertaḥi n lejruḥ d tektiwin tiqdimin d uceqqey n uglim, adawi-a werēad yettusemras deg tmetti yezmer ad iqabel tujjya tatrart (ماقري، صفحة 12).

Ad naf dayen cra n teēwinin ttruḥan yer-sen yudan bac ad swen nepq ad ssirden, zerren-ten seān lbarekt d ccfa, ttdawan tujjra ney sshur, awalya tisednan yexsen ad arwent ney ad reclent s usemres n cra n yiseflan n utberrek (حمودا، 2016، صفحة 142).

Nezmer ad d-nini adawi-a werēad yella al imir-a deg tmettiwin titrarin awalya deg Dzayer, s wudem d ameqqran, yudan tthennan aman d aferdis agaman, adawi yes-s d abayur i tdawsa yexs d tisessi ney d asired, ud yeqqin ca yer sshur maca d adawi d agaman.

### 2-5-Adawi s tejbirt

D adawi yettusemrasen i tweēit n trezzitin n yiḥsan ney d amelmez, ttdawan yis-s yudan ukk yexs d aẓiwali ney d amerkanti, seān asirem d ameqqran deg udawi-a akked umdawi-nnes, tettusemras s tarrayt taḥerfit tushilt, yal yiḡ yezmer ad yesber fell-as, yettawi yer ugemmuḍ yeḥlan (Mebtoul, 1998, p. 5).

Adawi-a irfed-it yal yiḡ seg dadda-as ney baba-as, ney seg tarmitin deg labas n yiseggasen, ttsawan deg-s tiyawsiwin sehlen am zzit n uzemmur deg ultaf, xeddmn cra n urekti deg-s amellal n tmellalt d tisent d yiyemmayen yyiḍ, atg, wa ad t-ggen yeḥ wadeg n trezzit, tettawi-d tejbirt azal n 15 al 30 n wussan ilmend n tegnit n trezzit (شين، 2014 - 2015، صفحة 242).

D adawi aqbur yesseēdal tarezzit, yettwaxdam s ṭṭerf n lluh, jrid n tezdajt ney d isyaren n tsetṭa meḥsub n ulili, ad t-zlin yeḥ ugman yerrzen wa ad t-selben mliḥ bac ad mlaymen yiḥsan, beddun lettfeen adeg n trezzit s zzit n uzemmur ney d ddhan qbel, wa ad d-awin tiferca n tzeḡgart yeddzen, ad tent-xellḍen yid n waman d qič n tisent d eerg lesfer, ney ad xellḍen aren d tmellelt yyiḍ rennin qič n lḥenni, wa ad t-sawan yeḥ wadeg n trezzit, ad as-zlin akettan, wa ad t-selben mliḥ bac ad yettef ud yettnesram ca, yyiḍ zellyen-as ssluk izdadn d imdewwren (Meziane, 2003, p. 79) (إبراهيم، 2018).

Seg wawal-a nezmer ad d-nini belli timetti tadzayrit werēad tessmras tijbirin deg udawi n trezzit awalya deg yiqewwaren, mani yeqqim usemres-nnes s wudem aẓerfan aqbur, yettawi-d agemmuḍ yeḥla mani yettweēa iyess adeg-nnes mamek yella zik deg tfekka n umerrzu, ad naf ssemrasen deg-s cra n tyawsiwin d wallalen yezmer ad mxalfen seg tmenadṭ yer tict.

### 2-6-Adawi s tyudi

Tayudi seg yiseflan iẓerfanen iqburen, ttdawan yes-s aḍanen deg tfekka, tettusemres yer yya n zik s labas (بلود، 2000 - 2001، صفحة 88). Tettusemras i udawi n waḍanen am yiwriy s tyudi n yiyallen, lagrajem, atg, s ṭṭerf n wuzzal yeḥma yetteqqed ney d anesmar yeqqur yeḥ wadeg n uqraḥ wa ad sawan sennej-nnes lẓerweē yebzeg s waman bac ad yenqes uqraḥ-idin (شين، 2014 - 2015، صفحة 188).

Tarrayt-a iwessa fell-as Nnabi Muḥammed ‘ad isella Rebbi fell-as wa ad isellem’ d adawi aneggaru yellan ad iwella yer-s umaḍun axaṭer yuʿer ud izemmer ca ad t-yeḥmel,



yetteqqed labas, yezmer ad idurr tafekka n umaḍun ad as-yerni aqrah ujar n wa yesea.

### 2-7-Zzar (azerred ney lewædt)

D lewæed i ittuč umaḍun i izuren anil ma yexleḍ yer matta yessaram ad as-yuc tajmilt, ad d-iwella tikelt nniḍen wa ad d-yawi matta i t-yewæed (ama yessiweḍ-it yer tmuxsi-nnes ney aha) (دويده، 2015، صفحة 22) d tarat tadelsant tæerrem deg tmettiwin yemxalfen, timeyriwin-nnes ttilin s uḍawan, rraqes d leyina, llan yyid xessyen ud d-ttwaæan ca lexber, yetṭwen ud ttfagan ca.

Ttamnen belli yella wassay jar yudan d lerwah, seān tadubit yef uḍurri n yudan yef way-a ttzerraden bac ad mmukksen waḍanen wa ad mmeslaḥen yudan yid n lerwah d lejnun (شين، 2014-2015، صفحة 194، 196) s usemres n yisekkiren i udawi n umaḍun seg lerwah yudfen rruḥ-nnes wa ad yertah ma yuca-asen matta yexsen (عكاشة، بلا تاريخ).

Yettemxalaf Zzar seg tmetti yer tict ilmend n tewsit n wadan d tmental-nnes, d tegnit tadamsant d tmetti n wa isawan lewæedt, yettili deg yiḡ n wass ney ujar, ad yersen i yixef ney ujar, way-a ilmend n tegnit n umadun d matta i as-d-yezlin d ljenn i yettwaxedmen i udawi d ccfa, yettdawa aqrah n yimeslan, tagernint, aæezri, atg (شين، 2014-2015، الصفحات 194-196)

Ad negzu seg wawal-a belli Zzar ney azerred (lewæedt) seg yimgan idawiyen iyerfanen deg tmurt n Dzayer, yettusemrasen yer cra n yudan deg udawi n waḍanen awalya yya yeqqnen yer lerwah, lejnun d ccwatan, nehni ttamnen belli s yisekkiren yessexdamen ad yili ccfa maca ilaq ad ucen lewæyed i lerwah-idin, axater ma yella ssreksen fell-asen ad wellan lerwah fell-asen wa ad asen-kksen matta i asen-ucin ney ad ten-sudnen mamek llan zik.

Ad naf imnadiyen ukk ḍefren yiḡ n wawal belli adawi yeseān azal d ameqqran deg tmurt n Dzayer deg udawi n waḍanen, d adawi s yiyemmayen d uḍuri n yinilen d tnedlaw n Lewliya Ssalḥin mani ttruḥan yimuḍan

tteellaqen deg yinilen-nsen leḥruz d leḥjub yellan xedmen-ten-asen-d Tṭelba d Ccyuxa i ccfa d udawi seg waḍan ney i usiweḍ yer cra n yiswi i yexsen deg tmeddurt-nsen ، (أبو القاسم ، 1998، الصفحات 418-419)

### Igemmad

Deg unadi-a newweḍ yer cra n ugemmuḍ imi d-nefser iferdisen-nnes, nekti-d cra n yidawiyen iyerfanen yettusemrasen deg tujjya tayerfant deg tmetti n tmurt n Dzayer s uamata, mani nufa yella tamanawt deg yidawiyen-a, nuf-a belli ttdawan s yiyemmayen s wudem agejdan, axater d tyawsa i d-iyemmin deg ugama yezmer yal yiḡ ad tt-yawi bla ma yeteeb fell-as s labas, d tushilt deg usemres, iyemmayen-a zemren ad ten-swen ney ad derren yes-sen yef lejrūḥ ammin d amenyud ney ad ten-zmen, atg. Yella dayen udawi s ureqqi i d-yeqqim al imir-a s wudem atrar, axater zik reqqan s wawalen ud ttwafhamen ca d leḥruz, maca seg mi d-yudef Lislam wellan reqqan s Lquran i yeseān ccfa i yal aḍan.

Nufa-d dayen timetti tadzayrit tessemras adawi s uḍuri n yinilen d tnedkaw n Lewliya Ssalḥin d Yimrabḍen, tyawsa-a teqqim-d seg tallit taqburt mani ttamnen yudan s Lewliya-a belli seān lbarakt d ccfa ḥedd ud yesei matta yeseān nehni, zemren ad ucen ccfa i umaḍun ney ad as-ucen tumert deg tmeddurt d tnefsit-nnes, ney ad as-ucen matta yessaram ad yili yer-s ney ad yaweḍ yer-s. Yella dayen udawi s themmamin tigamanin d waman n teewinin imebrak, mani ad naf tagnit-a tæerrem deg Dzayer, yudan ukk ttruḥan yer themmani tigamanin ney d tiwinin n waman imebrak bac ad ssrden ney ad swen seg-sen s yiswi n udawi d utberrek seg waḍanen awalya aḍan n uglim ney n yiḡsan i yetṭef uqrah, ttamnen belli aman d tyawsa tagamant i d-yexleq Rebbi deg uagama seān ccfa i yal aḍan ney d aqrah.

Nufa-d tani adawi s tejbirin, way-a yettili deg tmetti tadzayrit deg yiqewwaren s labas axater deg-s i yellan imeqqranen yessnen ssemrasen adawi-a mliḥ s tarrayt yeḥlan yessertahaḥan tarezzit n yiḡess ney d amelmez.

## Tamanawt tadelsant deg tmurt n dzayer

Yella tani udawi s tyudi, way-a d tyawsa taneggarut i yettwella yer-s umaḍun axaṭer tuæer ud izemmer ca ad tt-yehmel labas, d adawi i iwessa fell-as Nnabi Muḥammed, tessertahay seg labas n waḍanen n tfekka.

Ma d adawi aneggaru i d-nufa d Zzar ney azerred (lewæedt), yettusemras seg zik deg Dzayer s yisekkiren d yiseflan iyerfanen s yiswi n udawi seg waḍan, mani yettsawa umaḍun tameyra deg lemḡama n cra n Lwaley Ssaleḥ wa ad yetleb seg-s ccfa s ccna d unecced d rreqes d uḥeḍḍer d usemres n lejnun d tyerrast d wuččan d lewæayed bac ad yertah umaḍun-idin, yemzer ad d-yawi ujar n sen n wussan.

### Tagrayt

Idles d rruḥ n tyerma, d tfawt n uneffu d tmussni. Tamanawt tadelsant d agemmuḍ n labas n yiseggasen i d-iaeddun seg tsuta yer tict, yal idles yessiliy-d tamagit n tmetti-nnes, tamanawt-a yezmer ad yili d aybalu d amerkanṭi jar yegduden d tmettiwin, yal agdud ney timetti mamek i t-tessemras ilmend n tegzi-nnes.

Tigemmi tarangawit deg tmurt n Dzayer d tigemmi tadelsant i iherzen yef yisnilla d tesbirin, imenzayen, iseflan, tiflas, isekkiren d tmussniwin n yudan yeqqnen yer tmeddurt-nsen, i dyugiren deg umezruy n yimezwura al mi d imir-a, awalya tujjya tayerfant i yesean azal d ameqqran deg tmetti tazayrit seg tallit taqburt al tura, temgared terni tærrem yal tamnaḍt mamek i tt-tessemras. Seg wa nezmer ad dnuc cra n yiwessiyen yef unadi-nney :

-Tmucit n wazal i tujjya tayerfant d unadi fell-as mliḥ deg tmurt n Dzayer s uamat d ulayem-nnes deg tezrawin d yidlisen bac ad teqqim ud tettruḥa ca, ud tettili ca deg timawit berk.

-Anadi deg yal tamnaḍt iman-nnes bac ad yili ulayem n tujjya tayerfant yehla axaṭer yezmer ad ilin cra n yiseflan deg cra n temnaḍt maca ud ttusemrasen ca deg temnaḍt tict ney ttusemrasen s tarrayt temgared yef tin, d wa-ya yettawin yer tamanawt adelsan.

-Axdam n yiyerbazn ujjayen ad yili deg-sen uselmed n tujjya tayerfant s yidawiyen-nnes yemgarden bac ad yili uḥraz fell-as deg tsuta tatrart, ad yili am netta am tujjya tatrart i yesean iyerbazen ujjayen.

Umuy n yidlisen d iyibula

Devoux , A. (1870). *Les édifices religieux de l'ancien Alger*. Alger: éd. Typographie Bastide.

Mebtoul, M. (1998, Mai). les significations attribuées à la prise en charge des deux maladie chronique (Diabète et hypertension artérielle à Tlemcen). université d'Oran.

Meziane, M. (2003). Origines de la médecine traditionnelle Marocaine : enquête de terrain dans la région D'Oujda . *thèse pour le diplôme d'Etat de docteur en pharmacie*. faculté de pharmacie, université de Nantes.

Spradley , J. (1973). *Culture and Cognition*. USA: Chandle Publishing Company.

عكاشة، أ. (د.ت). *الزوار في السودان: علاج نفسي شعبي*،

العدد 43 "عادات وتقاليد"

<https://www.folkculturebh.org/ar/?issue=43&page=showarticle&id=818>, 01/02/2021, 14 :32

إبراهيم، ر. (2018). *الطب الشعبي... علاجات متوارثة*

عبر الأجيال

<https://www.albayan.ae/fivesenses/heritage/2018-10-27-1.3393745>, 01/02/2021, 14 :59

أبو القاسم ، س. (1998). *تاريخ الجزائر الثقافي*،

ج2، 1500 - 1830 ، ط1 . بيروت: دار الغرب

الاسلامي.

التراث الصحراوي، التاريخ والذاكرة، أعمال ندوة

الداخلية الدولية. (2012). الرباط، المغرب: المجلس

الوطني لحقوق الانسان.

- حمودا، ح. (2016). الماء كمنشط أنثروبولوجي لإنتاج الطقوس بواحة سكورة جنوب المغرب. *إضافات،* شتاء - ربيع العددان 33-34، ص142.
- حمودي، ه ومصباحي، ح. (2017-2018). الأمراض والأوبئة في الجزائر أواخر العهد (1770-1830) مذكرة مقدمة لنيل شهادة الماستر في التاريخ الحديث. قسم التاريخ، كلية العلوم الاجتماعية والانسانية، جامعة أكلي محند أولحاج- البويرة-
- حميدة، س. (2019). عناصر التراث الثقافي للامادي الجزائري ومنهجية صونه. *مجلة الآداب، المجلد: 19، 01 ديسمبر،* ص ص 100 - 101.
- دودو، أ. (1975). *الجزائر في مؤلفات الرحالين الألمان (1830-1855م)*. الجزائر: الشركة الوطنية للنشر والتوزيع.
- دويده، ن. (2015). المعتقدات والطقوس الخاصة بالاضرحة في الجزائر خلال الفترة العثمانية. *انسانيات،* العدد 68 افريل- جوان، ص ص16 - 22.
- رشيق، ح. (2010). سيدي شمهروش الطقوسي والسياسي في الاطلس الكبير، ترجمة: جحفة، عبد المجيد والنحال، مصطفى، ط2. المملكة المغربية: دار افريقيا الشرق.
- سرقمة، ع. (2011). تاريخ الثقافة والحياة الاجتماعية في الصحراء الكبرى: الصحراء الجزائرية نموذجا. *مجلة الواحات للبحوث والدراسات،* ص198.
- سفاري، م وشين، س. (2013). العلاقة بين الطب الشعبي والطب الرسمي. *مجلة علوم الانسان والمجتمع،* العدد 05 مارس. ص199.
- شوتيام، أ. (2005-2006). المجتمع الجزائري وفعلياته في العهد العثماني (1819م- 1830). رسالة مقدمة لنيل شهادة درجة دكتوراه في التاريخ الحديث والمعاصر. جامعة الجزائر.
- الخولي، ح. (1982). *الريف والمدينة في مجتمعات العالم الثالث*. القاهرة، مصر: دار المعارف للطباعة والنشر.
- العامري، ن. (2001). *الولاية والمجتمع مساهمة في التاريخ الديني والاجتماعي لافريقية في العهد الحفصي، ط1*. تونس: منشورات كلية الآداب والفنون والانسانيات.
- العبيدي، ع. (2018). أهمية الحفاظ على التراث الثقافي غير المادي في الموصل. *دراسات موصلية،* حزيران العدد 48، ص82.
- العمرى، ن. (1998). *أضواء على الثقافة الإسلامية*. دمشق، سوريا.
- أمزيان، و. (د.ت). *الانصهار الثقافي الأمازيغي العربي في منطقة الأوراس وتأثيره في هوية السكان*. مجلة العلوم الإنسانية والاجتماعية، عدد خاص الملتقى الدولي الأول حول الهوية والمجالات الاجتماعية في ظل التحولات السوسيوثقافية في المجتمع الجزائري، ص454.
- بلعز، ك. (2019). فلسفة التعايش ودورها في التنوع الثقافي. *مجلة آفاق علمية، المجلد 11،* ص603.
- بلود، ع. (2001-2000). *الطب الشعبي بمنطقة تلمسان، دراسة تحليلية ونقدية*. رسالة مقدمة لنيل شهادة الماجستير. قسم الثقافة الشعبية، كلية الآداب والعلوم الإنسانية والعلوم الاجتماعية، جامعة ابي بكر بلقايد - تلمسان.
- بوحجرة، ع. (2015). *الطب والمجتمع في الجزائر خلال العهد العثماني (1519-1830) رسالة لنيل شهادة الماجستير في التاريخ الحديث،* جامعة وهران.
- بينيت وآخرون، ط. (2010). *معجم مصطلحات الثقافة والمجتمع، ترجمة سعيد الغانمي، المنظمة العربية للترجمة*. بيروت، لبنان: توزيع مركز دراسات الوحدة العربية.

شيلز، إ. (2004). التراث: تأصيل وتحليل من منظور علم الاجتماع، تر: أحمد الجوهري وآخرون. القاهرة: مطبوعات مركز البحوث والدراسات الاجتماعية.

شين، س. (2014-2015). التصورات الاجتماعية للطب الشعبي - دراسة ميدانية في منطقة الزيبان - أطروحة نهاية الدراسة لنيل شهادة دكتوراه العلوم في علم الاجتماع، تخصص علم اجتماع التنمية. قسم العلوم الاجتماعية، كلية العلوم الانسانية والاجتماعية، جامعة محمد خيضر - بسكرة.

صالح محمود، ع. (2007). الطب الشعبي في منظور أطباء الطب الحديث (دراسة ميدانية في مدينة الموصل). دراسات موصلية العدد الثامن عشر، تشرين الثاني، ص127.

صحراوي، ف. (2010-2011). الجزائر في عهد الداوي حسين. (1830-1818) مذكرة لنيل الماجستير في التاريخ الحديث والمعاصر. جامعة الجزائر 2.

عبد العزيز المطوع، ف وجابر المري، و. (2019). التنوع الثقافي بين طالبات المرحلة الثانوية بدولة الكويت من وجهة نظر معلماتهن: "ثانوية أمة بنت خالد" (دراسة حالة)، جامعة عين شمس. مجلة كلية التربية، العدد الثالث والأربعون، الجزء الثالث، صص18-23.

عطا الله، ر. (2018-2019). الأثر الاجتماعي لزيارة الأضرحة بتلمسان - ضريح سيدي أبي مدكن الفوت 594/520 هـ - نموذجاً. مذكرة مقدمة لنيل شهادة ماجستير أكادي مي في التاريخ، تخصص: تاريخ الغرب الإسلامي في العصر الوسيط، قسم التاريخ، كلية العلوم الانسانية والاجتماعية، جامعة محمد بوضياف المسيلة.

عمارة، ف. (2015). التنوع الثقافي كمصدر خلاق للإبداع. أعمال المؤتمر الدولي الثامن:

التنوع الثقافي، طرابلس: مركز جيل البحث العلمي، صص12-15.

عمر الصادق، ص. (2006). دراسات سودانية في الآثار والفلكلور والتاريخ. الخرطوم: دار عزة.

عومري، ع. (11 ماي 2007). الحياة الثقافية والفكرية في الجزائر 1880-1914. أطروحة مقدمة لنيل شهادة دكتوراه الطور الثالث D.M.L في تاريخ الحركة الوطنية والثورة الجزائرية، تخصص: تاريخ. قسم العلوم الإنسانية، كلية العلوم الإنسانية والاجتماعية، جامعة جيلالي ليايس سيدي بلعباس.

فراج، ز. (2012). الزيارة النسوية للاضرحة، مقاربة انثروبولوجية بضريح "سيدي قادة بن المختار بولاية معسكر". رسالة ماجستير. جامعة وهران.

قحايرية، س ومناصرة، ن. (2016). التراث الثقافي للجزائر من خلال المجلة الإفريقية، دراسة تاريخية إحصائية من 1856 م إلى 1954 م. مذكرة تخرج مقدمة لنيل شهادة ماستر "م د"، تخصص: تاريخ عام، الشعبة: تاريخ، الميدان: علوم انسانية واجتماعية. بيروت، قسم العلوم الاجتماعية، كلية العلوم الانسانية والاجتماعية، جامعة العربي تيسي - تبسة.

ماقري، م. (د.ت). تمثلاث الصحة والمرض وأساليب العلاج في المجتمع الجزائري، مقاربة سوسيولوجية، جامعة الجزائر 2، صص12.

مساني، ف. (2018). العلاج بالطب الشعبي وانعكاساته على الوعي الصحي للمريض المصاب بمرض مزمن في الجزائر - دراسة حالة داء السكري، الضغط الدموي والقلب. مجلة العلوم الاجتماعية - جامعة الأغواط - ، مجلد 07، العدد 29 مارس، صص161.